

Artigo 6. *Titulación.*

Os alumnos que superen os obxectivos do currículo integrado ao termo da educación secundaria obrigatoria obterán o título de graduado en educación secundaria. Así mesmo, estes alumnos estarán en situación de obter o Certificate of Secondary Education (GCSE) nas mesmas condicións que os alumnos do sistema educativo británico que cursasen as ensinanzas correspondentes.

Disposición derradeira primeira. *Título competencial.*

Este real decreto, que se dita ao abeiro do previsto no artigo 149.1.30.^a da Constitución española e na disposición adicional primeira.2.c) da Lei orgánica 8/1985, do 3 de xullo, reguladora do dereito á educación, ten carácter de norma básica.

Disposición derradeira segunda. *Desenvolvemento regulamentario.*

O ministro de Educación e Ciencia poderá ditar, no ámbito das súas competencias, as normas que sexan precisas para a aplicación e desenvolvemento do establecido neste real decreto.

Disposición derradeira terceira. *Entrada en vigor.*

O presente real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 20 de xuño de 2005.

JUAN CARLOS R.

A ministra de Educación e Ciencia,

MARÍA JESÚS SAN SEGUNDO GÓMEZ DE CADIÑANOS

MINISTERIO DE ECONOMÍA E FACENDA

11745 *ORDE EHA/2167/2005, do 29 de xuño, pola que se aproba o modelo DDC de declaración de desagregación de cotas centralizadas do imposto sobre hidrocarburos e se establecen as súas normas de presentación.* («BOE» 162, do 8-7-2005.)

A falta de harmonización da estrutura do número de accisas que cada Estado membro lles atribúe aos seus operadores no ámbito das súas competencias, denominado no noso ordenamento xurídico Código de actividade e establecemento (CAE), era a causa dun importante número de problemas no funcionamento da base de datos SEED (System of Exchange of Excise Data) prevista no artigo 15 bis da Directiva 92/12/CEE do Consello, do 25 de febreiro de 1992, relativa ao réxime xeral, tenza, circulación e controis dos produtos obxecto de impostos especiais, e supoñía un impedimento á implantación na comunidade do sistema de informatización dos movementos e os controis dos produtos suxeitos a impostos especiais aprobado por Decisión n.º 1152/2003/CE do Parlamento Europeo e do Consello, do 16 de xuño de 2003. Por iso, o Comité de Impostos Especiais da Comisión Europea acordou unha harmonización do «número de impostos

especiais» a nivel de 13 caracteres, dos cales os dous primeiros teñen que ser o código ISO do país, e os restantes un código de serie alfanumérico de 11 caracteres determinado polas respectivas autoridades nacionais.

A nova estrutura harmonizada foi incorporada á nosa normativa polo Real decreto 87/2005, do 31 de xaneiro, polo que se modifican o Regulamento do imposto sobre o valor engadido, aprobado polo Real decreto 1624/1992, do 29 de decembro; o Regulamento dos impostos especiais, aprobado polo Real decreto 1165/1995, do 7 de xullo, e o Regulamento polo que se regulan as obrigas de facturación, aprobado polo Real decreto 1496/2003, do 28 de novembro (BOE do 1 de febreiro), que lle dá unha nova redacción ao punto 2 do artigo 41 do Regulamento de impostos especiais. Este artigo establece que o Código de actividade e establecemento constará de 13 caracteres e desenvolve a súa distribución.

Esta nova estrutura harmonizada e as significativas modificacións que se produciron no imposto sobre o hidrocarburos, especialmente en materia de biocarburos, recollidas no Real decreto 1739/2003, do 19 de decembro de 2003, polo que se modifica o Regulamento dos impostos especiais, fan necesario aprobar un novo modelo DDC para a declaración de desagregación de cotas centralizadas correspondente ao dito imposto especial, distinto do modelo DCC de declaración de desagregación de cotas centralizadas de impostos especiais de fabricación, que foi aprobado pola Orde do 28 de decembro de 2001 (BOE do 5 de xaneiro de 2002), e establecer as súas normas de presentación para diferenciar a aplicación dos beneficios fiscais aos biocarburos segundo os procedementos actualmente existentes.

Polo que se refire ás habilitacións normativas, o punto 4 do artigo 18 da Lei 38/1992, do 28 de decembro, de impostos especiais, encoméndalle ao ministro de Economía e Facenda o establecemento do lugar, forma, prazos e impresos en que os suxeitos pasivos deben determinar e ingresar a débeda tributaria exixible polos impostos especiais.

En consecuencia, e facendo uso das atribucións que teño conferidas, dispoño:

Primeiro. *Aprobación do modelo DDC de «declaración de desagregación de cotas centralizadas».*

Apróbase o modelo DDC «Declaración de desagregación de cotas centralizadas», que figura como anexo desta orde, para a declaración da desagregación de cotas centralizadas do imposto sobre hidrocarburos.

Segundo. *Normas de presentación do modelo.*

Os suxeitos pasivos do imposto sobre hidrocarburos autorizados polo centro xestor á centralización da presentación das declaracións-liquidacións e o ingreso simultáneo das cotas líquidas deberán presentar telematicamente pola internet a declaración de desagregación de cotas centralizadas xunto coa declaración-liquidación, ou ben, por duplicado, na oficina xestora do seu domicilio fiscal, conxuntamente co exemplar para a Administración da correspondente declaración-liquidación xustificativa do ingreso das cotas ou, no seu defecto, autorización de aprazamento ou fraccionamento do pagamento.

A presentación da declaración de desagregación de cotas pola internet realizarase nas condicións establecidas na Orde HAC/1149/2003, do 5 de maio, pola que se establecen as condicións xerais e o procedemento para a presentación telemática pola internet dos documentos utilizados na xestión de impostos especiais e se modifica a Orde do 22 de marzo de 2000, pola que se aproban os novos modelos de relacións recapitulativas e os soportes magnéticos de documentos de acompañamento expedi-

dos e de documentos de acompañamento recibidos en tráfico intracomunitario, incluídos os simplificados.

Os suxeitos pasivos do imposto sobre hidrocarburos que, en virtude do disposto nesta orde, estean obrigados a presentar a declaración de desagregación de cotas centralizadas DDC non deberán presentar o modelo DCC aprobado no anexo da Orde do 28 de decembro de 2001.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado» e será de apli-

cación aos documentos e declaracións correspondentes a períodos impositivos que se inicien a partir de xullo de 2005.

Madrid, 29 de xuño de 2005.

SOLBES MIRA

Sres. Secretario de Estado de Facenda e Orzamentos e director xeral da Axencia Estatal de Administración Tributaria.

Instrucións para cubrir a declaración da desagregación de cotas

Este documento deberase cubrir á máquina ou utilizando bolígrafo sobre superficie dura e con letras maiúsculas.

Se é necesario utilizar máis dunha folla, indícarase o número de orde do total do número de follas.

Código de oficina xestora: indícaranse os dous díxitos correspondentes á delegación da AEAT da oficina xestora de impostos especiais.

Identificación do suxeito pasivo: identificarase o NIF e o nome e apelidos ou razón social do suxeito pasivo autorizado polo centro xestor para a centralización de ingresos.

Devengo: trasladaranse os datos consignados ao respecto na correspondente declaración-liquidación centralizada.

Desagregación de cotas centralizadas: as cantidades expresaranse en euros, cun máximo de dúas cifras decimais, redondeando por defecto ou por exceso, segundo que a terceira cifra decimal sexa, ou non, inferior a 5.

Código de actividade e de establecemento (en diante CAE): por delegacións da AEAT, consígnaranse os CAE dos establecementos do suxeito pasivo, que comprende a autorización de centralización (os caracteres sexto e sétimo do CAE identifican a oficina xestora).

Epígrafe: deberanse consignar as epígrafes correspondentes aos produtos a que afecta a dedución.

Cota íntegra: indícarase a cota íntegra correspondente a cada CAE para cada unha das epígrafes. Declararase unha única vez por CAE e epígrafe.

Minoracións da cota:

Concepto: este recadro cubrirase:

Cando o suxeito pasivo aplique as deducións da cota previstas na normativa de impostos especiais. Neste caso deberá indicar o artigo e o punto da Lei 38/1992, de impostos especiais, que autoriza a realizar a dedución, de acordo coa seguinte codificación:

A. Artigo 51.3 segundo redacción vixente o 31-12-2002. Réxime transitorio das exencións do imposto sobre hidrocarburos en actividades piloto para o desenvolvemento tecnolóxico de produtos menos contaminantes, previsto na disposición transitoria sexta da Lei 53/2002, do 30 de decembro, de medidas fiscais, administrativas e da orde social.

B. Artigo 52.d).

Importe: deberase indicar o montante que se teña que deducir correspondente a cada CAE por concepto e epígrafe. Se non fose posible a súa desagregación consígnarase ao final do documento, no espazo previsto para o efecto.

Minoracións da cota non imputables aos CAE: este recadro cubrirase:

Cando o suxeito pasivo aplique as deducións da cota previstas na normativa de impostos especiais e non sexa posible a súa desagregación. Neste caso deberanse cubrir os recadros epígrafes, importe e concepto e indicar, neste último recadro, a letra A - artigo 51.3 segundo redacción vixente en 31-12-2002. Réxime transitorio das exencións do imposto sobre hidrocarburos en actividades piloto para o desenvolvemento tecnolóxico de produtos menos contaminantes, previsto na disposición transitoria sexta da Lei 53/2002, do 30 de decembro, de medidas fiscais, administrativas e da orde social.

Cota líquida: será a diferenza entre cota íntegra e deducións por CAE. Declararase unha única vez por CAE e epígrafe.

O documento deberá ser subscrito polo suxeito pasivo e presentarse conxuntamente coa declaración-liquida-

ción centralizada e as declaracións de operacións que proceda, na oficina xestora do domicilio fiscal, salvo que a súa presentación se realice pola internet igual que a correspondente declaración-liquidación centralizada

MINISTERIO DE AGRICULTURA, PESCA E ALIMENTACIÓN

11750 *REAL DECRETO 754/2005, do 24 de xuño, polo que se regula o réxime da taxa láctea.* («BOE» 162, do 8-7-2005.)

Tras a publicación do Real decreto 291/2004, do 20 de febreiro, polo que se regula o réxime da taxa láctea, que constitúe o desenvolvemento regulamentario da disposición derradeira terceira da Lei 62/2003, do 30 de decembro, de medidas fiscais, administrativas e da orde social, a Xeneralidade de Cataluña interpuxo ante o Goberno un requirimento previo de incompetencia por entender que a citada disposición non se axustaba á repartición constitucional de competencias entre o Estado e as comunidades autónomas. O Goberno, mediante o Acordo do 11 de xuño de 2004, aceptou parcialmente o dito requirimento e acordou ao mesmo tempo iniciar un proceso de revisión do réxime da taxa láctea para establecer unha nova normativa respectuosa co citado réxime de distribución de competencias.

Por tanto, este real decreto ten como obxecto principal dar cumprimento ao citado acordo do Goberno, mediante o establecemento dun novo marco de asignación de funcións entre as autoridades competentes das comunidades autónomas e o Ministerio de Agricultura, Pesca e Alimentación na aplicación do réxime da taxa láctea. A este respecto, os órganos competentes das comunidades autónomas serán a autoridade competente en todo o relativo á xestión e control do réxime, respecto dos produtores e dos compradores cuxas explotacións ou cuxa sede social se encontre no seu ámbito territorial. Todo isto dentro do marco global de responsabilidades, no cal lle corresponde ao Ministerio de Agricultura, Pesca e Alimentación, a través do Fondo Español de Garantía Agraria, a competencia na coordinación de actuacións, así como o establecemento das condicións básicas de funcionamento do sistema de control, a comprobación da superación da cantidade de referencia nacional de cota láctea asignada a España e a práctica das liquidacións correspondentes en caso de superación da cota.

A complexa natureza do sector lácteo en España aconsella que a plena vixencia deste novo marco regulador teña lugar tras un período transitorio que se prolongue ata o final do período de taxa 2006/2007. Así mesmo, é necesario que este proceso vaia acompañado de mecanismos eficaces de coordinación que permitan unha aplicación efectiva do réxime de taxa. Para iso créase unha mesa de coordinación coa participación de representantes das comunidades autónomas e do Ministerio de Agricultura, Pesca e Alimentación, así como un sistema de información que garanta a unicidade de toda a información que sobre o réxime de taxa deben dispor todas as administracións implicadas.

A experiencia adquirida tras a entrada en vigor do Real decreto 291/2004, do 20 de febreiro, aconsella aproveitar o proceso de revisión antes mencionado para modificar determinados dos seus preceptos, de carácter técnico, que permitirán unha aplicación máis eficaz da norma. Estes preceptos refírense fundamentalmente a